

SENGAJA CEMAR NAMA BAIK SAYA!

Afdlin nafi dakwaan salah laku perolehan projek DBKL

Kuala Lumpur

Pelakon dan pengarah terkenal, Datuk Afdlin Shauki menafikan dakwaan salah laku dalam perolehan projek di bawah Dewan Bandaraya Kuala Lumpur (DBKL) yang tular di media sosial.

Menerusi kenyataan yang dimuat naik di Instagram, Afdlin menegaskan tuduhan itu adalah fitnah yang sengaja direka oleh pihak tidak bertanggungjawab untuk mencemarkan reputasinya.

"Pertama sekali saya menafikan sekeras-kerasnya apa-apa unsur salah laku dalam perolehan projek itu.

"Ini satu usaha oleh pihak tidak bertanggungjawab untuk memburukkan nama saya. Agenda pihak ini hanya didorong perasaan hasad dengki dan dendam tidak bertempat.

"Saya sudah membuat laporan polis bersama pihak berkaitan untuk membolehkan siasatan dijalankan berkenaan perkara ini. Saya difahamkan perkara ini juga sedang disiasat secara dalaman oleh DBKL," tulisnya.

Dalam masa sama, Afdlin turut menyatakan kesediaan untuk memberi

kerjasama sepenuhnya kepada mana-mana agensi penguatkuasaan yang menjalankan siasatan berkaitan perkara ini.

"Saya menyeru saudara saudari sekalian untuk memberi ruang kepada pihak-pihak yang berwajib untuk melaksanakan tanggungjawab mereka.

"Fitnah dan tohmahan berniat jahat ini tidak seharusnya dibiarkan berleluasa. Saya yakin dan pasti dengan izin Allah, akhirnya kebenaran akan tersuluh dan keadilan akan ditegakkan," tulisnya.

Terdahulu, media melaporkan DBKL melancarkan siasatan dalaman berhubung dakwaan salah laku seorang ahli lembaga penasihat yang dikaitkan dengan pemberian projek bernilai RM4 juta.

Datuk Bandar Kuala Lumpur, Datuk Seri Maimunah Mohd Sharif dilaporkan mengesahkan siasatan itu dan sedang bekerjasama rapat dengan unit integriti DBKL.

Dakwaan salah laku membabitkan ahli lembaga penasihat itu mula tular di media sosial, beberapa hari lalu.

Ia membabitkan pelanggaran proses tadbir urus berkaitan perolehan projek kerja penerbitan bahan kreatif untuk DBKL bernilai RM4 juta yang didakwa tidak diberikan melalui tender terbuka.



Fitnah dan tohmahan berniat jahat ini tidak seharusnya dibiarkan berleluasa. Saya yakin dan pasti dengan izin Allah, akhirnya kebenaran akan tersuluh dan keadilan akan ditegakkan"

Afdlin Shauki

